

希古堂集

希古堂文乙集卷第四

南海 譚宗浚 叔裕

眉州瑞蓮亭拜東坡先生生日詩序

曩同治甲子宗浚在廣州約同人拜東坡先生生日於妙高臺則先生舊游處也迨光緒戊寅宗浚在眉州約同人拜東坡先生生日於瑞蓮亭則先生舊居處也惟先生以昴宿之降精作鬣雲之現世前生福德結西湖長老之緣小謫風波到南海要荒之地凡夫軒輊所賁楮墨偶題草木餘馨山川煥采每值茲覽揆之候咸願申祝延之儀意先生之靈爽連蜷精神赫奕當必如夢

過廬山之境狂馭三霄抑將如俯臨潁水之陂化身百  
影始足以歆其肝鬢鑒彼肫誠者已斯地者與菩薩閣  
而齊高卽紗縠行之故址比鄰野叟尙事祈蠶往日村  
巫能談磨蝎相傳先生生時有嘉蓮之瑞故以爲名亭  
前有池約可數畝雜種蓮芡之屬岸樹皆奇古大可蔽  
牛兩廊徧刻先生墨蹟凡十餘種書堂故在釣石猶存  
牆蕉餘半蝕之題徑柏紀曾攀之迹旣不等黃樓置酒  
偶宴集於羣僚亦非同赤壁橫舟僅登臨於兩度固宜  
精魄實此式憑宗浚昔屬部民今爲軺使肅瞻祠廟虔  
奉苾芬聊復蕘芋糝之羹薦松黃之液醅黎子雲之佳

醞焚吳子野之奇香新茶則采自鶴峰芳桂則釀從蠻  
峒清齋足供不勞佛印之花豬古燈高懸兼仿劉景文  
之松鶴想先生其亦許之乎是日也會者凡數人勝槩  
風騫新詞霞舉鱸白魚而作饌招元鶴以下飛仰瞻乎  
椰冠柳杖之容高唱乎鐵板銅琶之曲折梅花而作壽  
願共邀乎綈袂仙人腰竹遂以隲詞或足繼於紫裘進  
士云爾

厓門懷古詩序

夫耀靈匿景寒門有銜燭之龍巨川決隄絕島有填波  
之鳥士君子策名擔爵受賑行師雖復龜玉已更鼇維

早斷在三之節彌勵不二之忱永貞如柱厲叔之守官  
甘隨赴難如楚申鳴之挺節足愧爲臣歲紀邈遷英靈  
靡沫固其宜已若今厓門山者蓋宋端宗航海故地而  
陸公秀夫張公世傑殉節處也慨自運移天水祚盡庚  
申旌車已逼於近郊降表爭簽乎名字當是時也金輿  
已去木枿爭浮半壁江山難如司馬三齊故地尙有諸  
田彼益衛二王者筮匪橫庚肉幾局縮豈有樓桑之兆  
曾無苑柳之徵旣熏丹穴以求君遂著黃襪而作嫺宛  
城未下召劉盤子以探符建業已亡奉蕭眇僧而纂嗣  
方欲使帝星復朗女水無湮返故鼎於暉臺熾炎精於

火井而卒之湛盧去國覺竟構於夫差越甲鳴君恥盡  
同於右轂射湖有志橫海無功不聞蒼兕之羣呼竟見  
白虹之兆沴返風之術劉昆之智終窮沈璧空祈荀偃  
之師莫濟蓋至厓門之敗而二公亦自知其不守也至  
於北寺長囚西河築館時則文公天祥以罵賊張巡作  
離家蕭綜方其燈昏照壁月苦攙弦梁獄無上書之辰  
楚囚有南音之操夢波濤於鯨島盼消息於烏頭條侯  
被逮見監卒而心傷溫序銜鬚望鄉關而不見其相繼  
而就義也若賁星墜而渤海決濛汜委而望舒明事有  
先後理惟一致焉之數公者向使其復國之議果成勤

王之師勿敗不見執於宏範不見讒於宜中激晉鼓之  
兩甄奮漢兵之五道齊庭燕下或有神師涼幕梟鳴非  
無吉兆亦何難文移詛楚書號絕秦連雞既見其合圍  
十鼠當令其盡磔虞詡之平羌虜眾僅三千張奐之據  
龜茲人惟二百而乃國同孱趙兆比亡吳焚鐵鎖以江  
開占玉牀而星動祈父祈父捍難空殷阿童阿童臨流  
竟渡問救援則聊城書滯言守禦則疏勒矢窮恥師氏  
以歸周同申徒而入海迨至角聲多死轡軸胥焚拔劍  
隨波難如古冶乘船溺水竟阨慕容投白筆而誰前問  
黃衫而早辨元纁篋組空歸國子之元白馬流蘇悵望

庾公之旄遂使碧幢將士黃屋君臣委骨鯨淵羈魂鯉  
渚修門乍入難問巫陽部曲重歸慘呼都護噫嘻烈矣  
且夫永嘉亂擾靈武播遷一則畫江可以圖存一則命  
將旋皆收復從未有朝無麴索臣盡張韓田迴異乎一  
成博難稽乎孤注板輿西狩宮殿變於葦庭紫蓋無歸  
銅駝埋乎荆棘北風嗟乎甚勁西鄰同其責言松耶柏  
耶難問故君之居鸚之鵠之匪云野井之辱臨江節士  
慷慨銜刀隆準王孫淒迷讀曲蟠龍夜折與軹道以俱  
焚凍雀朝飛問紇于其何樂將所謂臨安王氣終於秋  
壑者乎嗚呼陵谷變遷風塵閒寂見茂陵之玉匣空乞



奇方弔魏闕之銅盤竟迷鉛淚白門種麥悲憤何多滄  
海生桑飄零已矣猶幸其搢拄綱常扶持正氣君不作  
黑狐之聚銜壁而偷生臣甘隨化鶴之軍衝鋒而蹈義  
以故遺黎感痛故老歔歔誦王炎午生祭之文風霜氣  
壯奏汪水雲思歸之操宮闕心傷聯沙社者每有哀吟  
卜橋亭者時聞屑涕掩骸義士終瘞黑龍晞髮才人高  
吟朱鳥此又慕陟山之勁節追蹈海之奇蹤沛國隱居  
豈知王臘南村高臥無媿晉臣亦可見養士之報隆而  
成仁之才眾者矣今者局牘殘棋臺荒銅狄一間茅屋  
仍祭昭王三百遺民猶懷馬援僕也僑居穗石檣棹蕉

門古木叢祠尙下杜鵑之拜荒陵廢殿如聞甲馬之嘶  
爰挹英風聊成短弄庶使責周穆王之璧移文願共吳  
均經漢武帝之臺奏表或同沈炯云爾

辛巳八月十五夜學海堂翫月詩序

昔唐歐陽詹云月之爲翫冬則繁霜太寒夏則蒸雲太  
熱故惟秋也其氣森肅其容沈寥灝漭微負釐朗發越  
山川混混婉孌而萬色松竹娟娟縞潔而一致能使人  
滌捐煩慮斂俗襟瀹性濬靈蠲疴濯穢故間曠夷適  
之士恆樂焉粵秀山學海堂者儀徵阮文達公課士之  
所也常袞講堂文翁石室絢述舊集誦絃勿衰余自甲

子以迄癸酉每屆中秋恆偕同人翫月於此海氣噓蜃  
近侵眉端山風叫鴟時出腦後圓鏡開而綠烟滅懸珠  
吐而清露晞時則高李多屬少年祖謝並爲同學踞石  
諧譟噪於投林之鴉穿鼓往還捷逾上樹之犢躡草而  
坐攀條以吟霜露淒神巖巒荅響挹袖起舞便謂浮邱  
共昇題詩甫成冀將峴石同壽凌厲踔發一往無前每  
憶杜老樂遊右軍曲水感懷少壯寄喻彭殤怪悲戚何  
自而生疑傷怨何由而集也迄今歲南歸重聯勝舉題  
襟共敘折柬相招而昔之曾與斯會者若鄧君嘯簣

維

森

陳君奎垣

起榮

馮君伯蓉

葆廉

彭君莪村

學存

趙君

子韶

齊嬰

梁君竹賢

葆乾

梁君虞皋

以廣

等並已芳蘭

早鋤宿草將刈追其聲歎猶恍平生激電驚淵奄然物  
化嗚呼昭昭元象時有欲賈之星博博坤輿豈無相離  
之水如數君者假使躋台袞位節旄振藻揚芬詎非國  
器乃南山之栗不永其年東海之桑難延其算老成者  
既歸岱宗而治鬼聰慧者亦返兜率而登仙睠此遺蹤  
頓成陳迹共倚之檻半隨螽穿同攀之條或已龍化雖  
復斛莊尚在楚些能招唱鸛鵒之挽歌空登廢壘澆鷗  
鷁之巨杓詎及重泉杳杳九原悠悠千古能勿痛哉能  
勿悼哉既而思之盛衰者時之變也離合者事之常也

此日可惜昌黎所以作歌良時在茲應璩所爲致簡幸  
與諸子同生

軒農熙皞之朝兼住嶺海沃饒之地毛髮未縞無潘岳  
之嗟腰腳尙輕有向平之願異日者卜鄰偕隱未審何  
如際此嘉辰相從懽樂進饅饌則備薦南海之膾泛尊  
罍則欲傾東瀛之波杯槃雜陳斗石亦醉揖李白之六  
逸澆其渴魂屏劉伶之二豪任其聒語諒不謂於荒淫  
無度已嗟嗟浮生若夢泡如幻如名絆我身利誘我軀  
衝風烈火百年須臾淵哉達人遊心古初元氣我舟太  
虛我輿無爲戚戚沈憂鬱紆今我不樂日月其徂謂余

不信請質望舒時同集者若干人余別有詩而敘其緣起如此

夏日山響樓宴集序

爲官者目厭於簿書神疲於鞭朴則必居爽塏處崇閎  
諏律稽經以博其趣所以攝其性而不煩也爲士者情  
纏於墳典志篤於簡編則必昇高明眺清淑解弢弛裘  
以適其天所以暢其機而不鬱也然則流連巖藪嘯傲  
煙霞息游以寫其懷陶詠以抒其意豈徒以玩景物騁  
觀瞻云爾哉山響樓者粵秀山之極高處也俯羊石以  
逶迤據鷺宮而岌嶮穹窿絕巘傍橘柚以開園芬馥香

煙湧芙蓉而建座每凭欄直睨卷幔斜臨風雲鬱其連  
綿原野廓其迴合指七洲之帆影迴落窗前聽雙塔之  
鈴聲翻從檻底余以夏日來此憩游溽暑方長炎風正  
扇則見巖花綻紫檐果垂紅平蕒輒而郊垌青芳篠吟  
而亭皋晚素蟬立夏疑聽蜀國之絃丹蝶翩翾尙帶韓  
宮之粉佳賞旣接幽懷頓清廊竹引而生涼礪梧飄而  
蓄吹岸雷忽震帝鼓旋驚嶺霧猶橫仙衣未卷象雲變  
滅蜃氣空濛野乍洗而初明林靜翻而欲泣相與闐巨  
陸睇平川俯曾巒揖遙巘拾青松而作塵共敘雅談折  
綠芰以開筵聊追韻事茲之遊也適吾性矣旣而虹生

北澗月吐東軒露墜階涼嵐昏戶暗高詠時振則遠希  
點狂清嘯徐發則近同阮傲孤琴獨撫則思逸嵇生濁  
酒間斟則趣耽陶令嗟夫蘿薜雖賤假我者風月之娛  
簞瓢雖貧縱我者山林之業又何必鬱伊善感侘傺無  
聊效吳質以長愁惜梁鴻之未遇也哉羣公欣茲嘉會  
咸有佳篇鸞鳳翔於楮毫蛟龍吐於胸臆騁高文而競  
奏殆同河朔之游感陳迹以興懷原異山陰之會聊疏  
短引用敘幽情云爾

龍樹寺讌集序

夫美玉琤珠韞輝於巖壑得良工爲之技拭斯寶光發



焉矣碩士魁儒潛聲於幽藪得鉅公爲之嘯拂則環才  
萃焉矣侍郎吳縣潘公翰林南皮張公冠古之才軼羣  
之量便蕃省闕敷厯承明躡履而上雲臺影纓而登禁  
禦近代欽爲卿景中朝日以鸞龍爰以休沐餘閒命儔  
獻侶樽罍並陳不異河朔之飲車駕駢集殆逾洛濱之  
會則有龍樹寺者都門之名利也近接陶然之亭遠連  
黑窯之廠修磴繚白曲樓飛丹挹輝四空延矚千里原  
野交絡溝塍錯橫鳥無塵凡之音草有芬馥之氣指峯  
岫如染黛睇城郭猶列屏落英颯纒布席以承之鳴泉  
崢泓援軫以寫之幽賞旣洽素筵始張白羽飛籌紅螺

注蓋髡幘徐墮杜觴累舉咸曰今日之會有數美焉地  
隔塵壅情遠濠濮斯美一也雲日晶澈襟懷散朗斯美  
二也交外形骸迹謝弢褻斯美三也嗚呼不離輦轂而  
九州之才彥麇至鱗萃不越方隅而千里之俊髦雲會  
霧合如金石之召感如宮商之引和紫氣占而賢人來  
德星朗而名士集何其偉哉若乃略雲泥之分耽文籍  
之娛混蘿袞之迹結邱樊之契大雅小雅訂其古懽勢  
交量交屏乎俗尙又足以見二公之量涵沖虛興寄寥  
廓德充而趣遠性靜而體舒匪徒曰盛會雅集而已走  
以不才獲侍文醺氎氎之鶴見賞於羊公蹄齧之馬謬

知於伯樂時人各賦詩僕亦繼作并僭爲之序將使流  
微逸韻永與斯地不朽焉

十薩海觀荷詩序

十薩海者都門之名刹也舊爲精藍今賸廣畝地富雜  
卉特多芰荷涼雲窅然澹盪無際潏灩方沼有如鏡張  
窈延長隄或類弓曲余以夏末挈侶來遊清晨啟途雷  
雨狎至紫電怒掣橫飛金蛇黃流傾奔似躍黑蜃我車  
搖兀輕若鳬鷁林避喧穿葦忘溼旣歷仄徑忽逢霽  
光微聞遠香乃在橋外石竇泄水疑通海潮澄潭照空  
不受斥草近人於其側設酒肆焉則見田田振影冉冉

流馨白搖雪烟紅浥嶺雪冷冷瑟瑟足清詩魂蕭蕭寥  
寥兼雜畫格夏玉相倚風磨之而有聲跳珠乍圓波撼  
之而更亂余與諸客穿鼓往還屐黏枯萍衣冒弱荇櫂  
首之艇膠泥更移哆脣之簫隔岸互奏泊乎曜靈匿景  
望舒未上折碧筍以代觴摘綠葉而包飯野鷺入座儼  
窺尊罍鮮鱗登盤莖以薑桂良會既洽豪談乃舉瓜戰  
茗談各徵故實荔酒蒲觴頓牽鄉思浩浩乎不知零露  
之沐首芳氣之襲襟也酒既酣客或詫而言曰昔杜陵  
漢陂之游放翁鑑湖之賞但誇勝境無聞佳侶今日之  
樂殆逾古人余曰是則然矣雖然晞晞之暉既中而易

晨博博之士已搏而易散古人云勝會不常盛筵難再  
豈不信哉假令諸君長居京國久住承明有呦鹿之呼  
羣無桓禽之析羽豈不甚善而不然者或影纓雲閣或  
建旄闔外溝水蹀躞乎東西浮雲飛馳於南北則合浦  
之葉飄搖靡恆塞門之蓬轉徙難定正未易重續斯遊  
已客曰然因序以紀之時同集者爲茂名楊蓉浦前輩  
願南海潘嶧琴衍桐陳天如序球兩前輩崔夔典編修  
舜球區鵬霄湛森楊俊三啟焯兩舍人番禺姚樾甫禮  
泰張延秋鼎華沈筆香錫晉三同年何雲裳榮階梁星  
海鼎芬陳桂溪景鑒三編修東莞鄧蓮裳前輩蓉鏡馮

壽山舍人鏡仁順德梁斗南前輩耀樞何壽南同年崇

光蔡貞石比部揆忠香山吳星樓比部應揚開平關壁

泉前輩朝宗暨余凡二十人

### 送吳少村方伯擢撫湖北序

夫挹玉醴於清冷之淵者則恆思屬饜負冬暄於寒沍之谷者則每願常溫大抵愛而喜喜而慕人之常情也況夫政化所宣普於遐邇戶稱杜母家頌秦君有不冀其闔澤宏塲祥暉久駐者乎方伯少村吳公涖粵有年由縣令洊躋大藩威行惠布今年夏

天子嘉其丕績擢撫鄂中於是章縫帳望送崔帥者咸

願留韓士庶瞻依依挽鄧侯者預妨聽鼓或乃見而詫曰  
服領以南古稱繁劇其駕鹿輶而來荷鸞綽而去者趾  
相錯也獨於公而臥轍攀輿拳拳莫釋意者公之除盜  
嚴歟察吏肅歟其聽訟皆審歟其造士獨殷歟余曰是  
固宜然然未足以盡公之惠政也蓋粵中苦兵燹久矣  
曩者承平之日人矜雁櫛戶有犀渠類齊土之紫衣習  
趙都之跼屣豪誇博雉侈甚烹羔盧家則紫瑁爲梁王  
氏則金錢鋪埒蓋五十重之錦幃麗飾相誇鑄卅六座  
之銅鑪橫財驟富乃自鳬徯作崇鼈令游魂馳烽已徧  
於七洲互市又分乎五口揚州郭裏無聞得寶之歌建

業城中已徧貼門之帖以至樊陂失業邸宅成墟東郭履穿西華帔裂舊日魚徐之宅多拆石而毀薪往時程卓之家或賣珠而易米又其甚者鷹以飢而遠颺虎以闕而啗人私同海曲之報仇謬學平陵之聚刦慕容憤憤因佛會以燒香盧寇湯湯擁戈船而恣掠蓋由富而貧貧而困馴至於盜風日熾而剽掠橫行也而官是土者尙欲震懾以威之苛碎以煩之賒錢帙布責令倍征雀羽魚頭多方索稅千貫納梁冀之賄十囊入棗嵩之家得不慮於元氣日凋而奸人窺伺乎公則與物爲春盟心若水挹顧建康之醕酒和以飲人展白太傅之溫



裘煖能庇物凡夫間架之錢公實免之推排之法公實  
停之按籍之苛公實止之算緡之擾公實懲之所由龍  
戶感懷馬流怵無翼都被化合神君慈父以隆稱蜀郡  
銘恩借文學大夫而講德也抑公非特善於吏才蓋又  
嫻於軍律往歲廣海之役殃徒俶擾絕島藏奸其高也  
則羊坂千盤其險也則鳥櫓九曲公乃練五陽之卒揮  
百保之軍手搏黃塵遙呼蒼兕歐刀受戮宜函馬勉之  
冠肘石空盛已碎張豐之璽妖氛盪滌人咸頌焉近者  
鷁舟甫放龍節方移特令郵亭免其供億徵豚索蒜無  
苛急之條載鶴攜琴得蕭閑之趣如孟嘗之辭合浦但

駕鄉船如呂望之赴營邱惟居客寢斯亦威鳳一羽足以知其五德者矣夫粵居邊徼而鄂則適當要衢粵幸救平而鄂則遞經蹂躪上之則爲官者借徵調之名切里徵村務爲谿刻則表率之也難次之則爲將者索逋懸之餉翻城閭市易以謹譁則撫馭之也難下之則爲民者儲待久空死亡相繼朝爲餓隸夕便陳人宋城多被析之骸秦獄有含冤之鬼南津估舶漸罕流通西潁農田誰爲勸課則拊循而安輯之也尤難然而馭馬者不改策而步驟調屠牛者不易刀而籠髀解鄂之民猶粵之民也以公負單複之才兼方圓之量下車褰帷憑

眺城邑望峴首則思羊公之政臨漢水則想陶桓之績  
過崇陽則觀植桑之剛美利猶存睇江陵則憶種橘之  
州清風何遠又能以治粵者治之行見風揮日舒霽洽  
露湛來暮之歌樂職之頌將必有傳播於江漢間者下  
走雖伏處海濱行能無算猶樂誦而述之以爲鄂人慶  
不卽以爲粵人慰乎凡送行者皆有詩都爲一集時同  
治三年龍集甲子之夏五月也

送李若農前輩乞假終養序

同治十三年七月翰林院侍讀學士前輩若農李公乞  
假終養

天子俞其請先是公上書陳事不報至是乃得

旨允歸諫章甫焚投牒遽返謝志簪組養榮山阿罷陳  
北闕之書歸潔南陔之膳嗟乎晉京尙盛張翰先還唐  
室方隆鄭薰獨隱此豈復常情所及哉於是都門人士  
祖帳相送鳬觴互酌鶴蓋成陰謳謠雜陳高論間發宗  
浚竊謂粵東上應離明旁盼海虞笏峙臺庾之嶺襟繞  
浪溫之水生是地者類皆踴趨於科名恬淡於祿膺故  
有三旌可卻甘志林藪六戟匪榮怡情邱壑古人之事  
則旣然矣請臚故實用助劇談亦如祝龐籍者之比以  
范蠡平送楊真者之擬之疏廣也乎正德中則有南海

白山倫公首冠南宮七載歸侍樂潘輿之奉忘蕭綬之  
榮契已默居休神家術以視公之始登巍科終慕大隱  
者殆相類矣然白山文集體類臺閣雖翺鳳矢音頗諧  
賡和而疥駝作賦亦病太愚其文藻未見能過人也當  
嘉靖之初則有順德蘭汀梁公逸翰颯騰英詞霞峻捧  
中州之槃敦張南園之旗鼓掃塵卻軌蜚遯是甘公生  
近同鄉宜切私淑然蘭汀惑志丹餌希情冲舉受三彭  
之訣求七解之方究之煉玉無靈點金乏術其志趣卻  
又異矣當嘉靖卽位之初則有南海渭崖霍公抗疏明  
倫首伸讜論引疾歸里怡情薜蘿今公抱劬劬如畏之

忱負嶽嶽懷方之概青蒲伏首皁囊載筆高堂諫而露  
臺遽寢鍾離在而殿舍不成卒之建章罷營射稽停役  
鯁直之操先後同符然公本量拓敦恹行無谿盎清濁  
等於醕酒屈伸類於屏風較之渭崖之偏激居衷乖崖  
挺志者亦微異焉當萬厯之初則有博羅孟奇張公讀  
書中祕返臥西園進饌花間洗帚竹下頤養之福鄉黨  
豔之孟奇職不過郎官位不過執戟色斯高舉養素儲  
真猶易易耳公則倬直內廷屢持英簜聲采遠耀嚮用  
方殷忽厭承明之廬言返通德之宅王晞平素不作熱  
官紀瑜胸襟初無貴仕方之孟奇似矣而猶未也大抵

公有白山之科第有蘭汀之詞藻有渭崖之剛斷有孟  
奇之雅量若乃盧牟六合緯繡九陔詩細歷神並皆成  
誦貝編壺史靡不該覽記祕書之卅乘識奇字之千名  
劉炫之畫圓畫方口無停滯何憲之甲部丁部手靡輟  
披斯則遠跨前彥上掩曩哲求之近代殆尠儷焉今者  
南山以南北山以北依桑作棟斫枳編籬著經之餘時  
肄笙雅作賦之暇還奉輕軒採菰葉以作餐弋鱸魚而  
入饌几杖嫻潔足云戲綵之堂輜蓋闐擁不羨鳴珂之  
里其爲欣悅抑可知也然宗浚竊有進者以公抱鉤河  
摘洛之才兼潤古雕今之業其或延英再召宣室重徵

包咸侍講禁中黃瓊高議臺上固足以被飾鴻迹邳張  
偉謨即使眷戀慈闈永依子舍斯晨斯夕以咏以陶而  
李謚攤書貴於百城劉畫懷卷榮於千駟問與里中諸  
子罔羅篋籍是正得失析羣言之異同刊眾說之譌謬  
勒爲鉅帙藏之名山行見士流皈依學術蔚林陽城居  
道州而道州化劉兆在河北而河北移汾曲講堂無以  
方其雅趣扶風學市無以喻其隆軌不足建樹人之業  
垂蓋世之名也哉宗浚謬以輅材獲承獎借揄揚溢分  
眄睠成飾聽習鑿齒之議論竟日忘疲睹元次山之顏  
色此生無恨乃者公還嶺左僕滯燕陲鴻魚之迹相違



鵜鰾之蹤易隔星離雨絕水遠山長晨風之思空託於  
寤言落月之想徒勞於夢寐送公之行蓋不能不悵然  
自失已三爵既盡羣篇雜陳聊用荒言俾爲批導凡送  
行詩若干首詮次如左

送梁香林大令之官江西序

目未睹乎簿書身未親乎鞭朴一旦膺墨綬綰銅符請  
璽而登程撤帷而履任虎冠之吏競肆倂張鷗嚇之胥  
互爲崖柴而且娖訾是擾煩劄爲勞慣低元亮之腰上  
奉宣明之面薛懷吉之在郡恆嫌供億以煩苛陽亢宗  
之任官每苦催科而拙滯居是職者不戛戛其難哉香

林梁君玉質自溫銀手如斷綫磊比石軒軒若霞鄭子  
游之胸襟心原似水李安民之福相面本如田乃者赤  
牒初來青旌遠適驂鸞灌嬰之城攜鶴雷煥之里班宏  
就道殆若登仙謝淪之官爰相祖餞不尙邳張之語不  
爲侈飾之詞競投篇章以當羔雁余乃進而言曰君知  
縣令之難而亦知縣令之易乎言未已客或請曰江西  
郡邑粗安瘡痍漸復打稽悉絕壑慄全平野無帶劍之  
夫戶有捐矛之詠鮫函扈帶無事隄防鶴膝犀渠半皆  
藏弄是宜易治余曰否或曰江西地連五畧界近三江  
業同單父之弦歌迴異潁川之刀筆潘京遠裔亦識文

章谷儉寒門咸知誦讀豆遵揖讓冠帶雍容斷無懂忮之風久習涵濡之化是宜易治余曰否或曰江西地當繁劇百貨所經徵收具有常規稅課恆多贏羨官是地者但使恪遵令甲時覈租丁冊檢魚鱗帳銷鼠尾縱復脂膏之不潤依然筐篚之常充正無慮債帥貽譏賤官見謂孫謙居廩始足相容貢禹賣田方能自給是宜易治余曰否今夫挹洪流於巨瀆其濡潤者亦祇瀕洑之微也瞻藐赫於鄧林其蔭庇者不過枝條之蔭也今之爲縣令者稱媿其容翕訛其狀張率懶看訊牒何祇罕判獄詞曾殊善搏之盧幾等不鳴之雁非慙同汲孺而

臥理偏優非醉比孔公而耽閑少事加以閃掄是習侈  
汰相高索鵠羽以求貲課魚頭而徵稅葛融齋裡但置  
檣蒲黎幹署中每陳伎樂范甯妄生營造秦朗頗受餽  
遺擅王車庾宅之華兼張婢裴牛之勝覓劉騰之紫纈  
急事誅求遺邢邵之白紬又爭投贈其取攜難壓而跋  
扈時形也亦固其所誠能使躡躡居衷欽欽御物闊疎  
以任事神禪以爲懷誦羔裘豹飾之詩恆知警勵畫虎  
尾春冰之館倍切兢持藉水鑒以銘心例冰壺而比潔  
則精神不擾綜理必精無患乎遺忘無虞乎迷悶折會  
稽之米足表清廉栽河陽之花并工嘯詠昔人云爲縣

令者不以爲縣令視之而以爲秀才視之則事無不治  
信哉信哉若夫拔薤鋤奸憩棠聽訟種榆蔥而定課庀  
竹木以程材嚴除五蠹之滋永絕九羊之牧應奉賦六  
百餘人之食覆審無差許楊建四百餘里之隄機宜悉  
當由是驤首雲漢蜚聲天衢徐升九列之班便作八州  
之督此則君之才力自優爲之正無待於鰥生之頌祝  
也已抑又聞之江西固名勝地也匡山矗峙接靄翠於  
層霄章水分流通寒潮於九派異日者張憑上計禽慶  
游山過賢令之境中經仁君之宇下捨魚之叟亦懍嚴  
刑馴雉之童咸知惠愛相與登官閣詣琴堂臚述見聞

傳爲政績遭田間之泥飲賦詩共美於嚴公陪湖上之  
清游張宴乃承於王宰君其亦一笑而許之乎別酒旣  
酌離懷遂多聊用荒言俾爲前馬睽違異地願將化東  
野之龍招隱他年留侯訂北山之鶴

送梁荔圃同年入都序

於耨瑟耕琴之日而想夫揚翹導滯之季豈不快哉豈  
不慰哉同年梁君神禪之懷奇魁之行家風素謹數馬  
喻其敬恭鄉望尤孚盜牛化其謙讓近者隨計吏詣上  
京北路揚鑣南宮奏藝行見卻詵射策欣聯臂以先昇  
崔立登科比摘髭而更易請從此別夫復何疑然而仲

由去國願乞贈言區冊還鄉猶求送序況僕與君若蛩  
駘之相比有夔蛇之共憐白傳之偕元九忝附齊年杜  
公之共薛三常隨痛飲敢效佩韋之義聊陳規填之詞  
竊謂都門人海品類淆雜士多似鯽客競如龍俠游者  
誇婁護之脣競媚者近劉輿之臆裴韜王執爭據要津  
謝笑顏嗔各分喜怒噉名固易招謗亦多以足下軒軒  
若霞珞珞同石曠識比於明鏡雅懷類於醅醪諒不至  
作鮠表而詆公卿著蛇賦而譏貴近所慮者疏狂自信  
坦率貽嘲或致書而未去葛龔或觸諱而直名陸抗善  
題鸚鵡恐來僕射之猜疑且食蛤蜊或被少年之玩侮

斯固周旋易忽瑕釁從生卽或守蹢蹢之小廉勵硜硜之介節齟糠耐苦織練忘貧但飲村醪不持庫絹然而宗慤慣嘗粗食豈可律人張融愛著詭衣終嫌駭俗倘置草具而便思留客或乘柴車而徑欲之官清貧逾庾氏之鮭眇劣比胡君之馬亦非所以崇體貌檢威儀也至於駟僮之流嚴僮之輩外爲梔貌內實蓬心螫射含奸蠅鑽逐臭聽其言則辨同鮑賜驗其罪則惡甚共驩假使愛僮奴之才勝方回信從事之惡非慶父車前酌酒則騶卒皆賓堂上觀書則輪人亦友假之羽翮獎以齒牙得不慮阿柄倒持神叢竊享乎已矣梁生世路多



艱人心善詐所望勤宣令德永葆榮名旣守尼山篤敬  
之箴兼悟老氏屈伸之旨委蛇以應物精覈以鏡機如  
徐景山之能介能通與時俯仰學李普濟之入粗入細  
遇事周詳庶幾元璧之葆真或不謂素衣之變質耳若  
夫星昏雨晦短驛輕郵古峽羃雲瀧聲似雨君山扁山  
之勝躅湏江灘江之竹枝漢水孤棹一篷雪聲吹臺悲  
風千里暮色以足下讀尙臺之傳夙慕壯游繙桑酈之  
編博稽古蹟行役雖勞豈足慮哉朔風正寒勉旃自愛  
嗟夫潭水千尺想汪倫別後之情蠻山幾重是高惠夢  
中之路

陳蘭甫夫子七十壽序

國家受命二百餘載闔澤滂布靈符欽臻光耀乎八垠  
恩覃乎六幕

文治之盛與漢比隆而一時鴻生鉅儒亦皆守疏箋摯  
訓詁采王育譚長之舊說輯申培薛漢之遺書篋哉邈  
乎其獨至者已蓋嘗論之漢自秦籍旣收之後以迄魏  
臺甫建之年魁士颯馳英儒霧集然兼通六藝惟有鄭  
君若我

朝則闔閭振聲戴錢嗣響高郵稍矜異派儀徵用集大  
成莫不貫弗羣經喉衿百氏偶拈一義如義御之麗於

天每訂一疑若建章之圖於地榛塗旣闢古誼大明繼之者其惟我蘭甫夫子乎今年二月爲夫子七艷壽辰浚時適督學四川乃馳書而請曰昔雖伯之鼎麋壽祝其永延此見於金石者也奚斯之詩燕喜頌其昌熾此見於聲歌者也要皆不足以述清芬揚懿嫻恭惟樸學寶祖司農匪徒元歎之企蔡邕殆比河汾之希卜夏請較量其品概用遙祝夫期頤可乎惟鄭君隱修經業兼明圖緯博覽強識義據通深說書屢駁許重問禮嘗從盧植夫子則手挾金匱胸羅玉鈐十事能知五行並下詮義極三萬字之富析疑無八十宗之訛以故明堂有

圖宛公玉帶之呈繪深衣有考訂孔冲遠之沿誤其同  
一也鄭君洞明占候算學尤精究七政之縮贏識九旗  
之飛變夫子則素明推步妙解旁要測海量山異術早  
該乎劉炫占星揆景專精遠過於周羣重差夕桀審其  
名隙積會圓精其數以故姚信妄論糾厥謬悠墨翟遺  
經通其奧澀其同二也鄭君之注三禮也詳九分爲限  
之形闡六體相生之理並復精研律呂證合聲詩夫子  
則神契倫夔心儀龍趙量之建武之尺按以開元之歌  
淮南三百六音無難剖辨鄭譯八十四調豈盡侏儻條  
列古聲俾通今樂以故制氏舊官展編得其曲折堯章

新曲按譜別其正訛其同三也鄭君於職方禹貢注釋  
特詳咸有據依匪同朶造夫子則盧牟兩戒緯繡九垓  
明說山說林之篇通畫方畫圖之術分門別戶奚殊裴  
矩丹青旁上斜行兼仿賈耽朱墨以故泣水之文誤刊  
班志牂江之派譌證酈書辨黑水則說正臚明考洮江  
則據援祖禹其同四也鄭君絕學詁訓尤精周禮之異  
文毛詩之破字或則義從段借或云說出故書夫子則  
刊俗體於菟醜辨奇姿於龍鳥源流必審殊葛洪椿酒  
之疑援據特精識徐整旄山之讀以故筆求鄒義分別  
部居統以四聲冥心獨得有臣鉉精通之學無釋瑛妄

改之嫌其同五也鄭君詩禮二音著於敘錄雖云依託  
要匪無因況反切旣始於叔然或私淑亦由於高密夫  
子則細推陸譜下證唐音爲孳縷之分爲揭櫫之表椎  
輪有自先華嚴四十母而早傳合轍皆同證凍水二十  
圖而亦可以故朗懸金鏡疑勘玉匙閉口籠口闡其微  
字父字孫聯其譜其同六也鄭君史學雖匪顓門然馬  
遷之書或疑注釋蕭何之律曾經章句其於掌故必所  
深諳夫子則夙富西編尤長乙部宏博類深甯叟而加  
以精研貫穿如魁紀公而刪其詰倨以故曰耕旣廣掌  
錄尤勤或評量而作調人或糾正而爲諍友其同七也

若夫鄭集二卷宋志久亡片羽吉光惟有嘉禾二頌夫子則轡龍擅譽吐鳳稱奇詠羊勝之屏風銘揚雄之繡補貝編壺史祕典咸該山柱河宮鴻文鬱吐繁惟散體遠紹昌黎賦才逾梁苑之雄儷語挾蕭樓之髓新詩甫出轡微織於弓衣小令偶填旗亭傳其唱本旣清才之藻拔復游藝以多能四十二章旁通楚夾三十五舉兼善篆珣揮毫則妙敵冰斯戲墨亦雋逾坡谷此又景陽餘錦安石碎金殆非鄭君所可企及已且夫挹巨壑之瀾知淄澠不妨共味聽大予之奏知笙磬本屬同音自頃炎宋代興紫陽晚出接龜山之統脈開鹿洞之宏規

意其獨闢町畦必且詆譏故訓顧竊嘗博稽語類綜覈  
全書論喪服則深致推崇言章句則未嘗詆斥觀答張  
敬夫之說知注疏未可厚非觀與魏應父之書知釋文  
亦宜熟讀然後歎考亭箸述心折禮堂孟荀本自同源  
董墨何嘗相詬宜通兩家之騎勿泥一孔之窺夫子表  
而出之刪淆亂於羣言訂折衷於一是又豈僅雷次宗  
之標識沿用舊題李鼎祚之著書旁搜逸象已哉尤可  
傳者鄭君少任嗇夫中遭黨錮三府徵辟抗志辭謝萍  
浮南北中更亂離雖節類鴻鵠而迹慚蛛隱夫子則嘖  
意五業兼長九能早張旗鼓於天南屢捧敦槃於



日下尹珍遠裔博稽祕緯羣書任昉早年已負文章宗  
匠逮夫竹王構釁米賊騰妖蒼精殲而鐵牡開赤燁怒  
而銅龍震圖籍多燼典章就湮恭承

景運中興咸欲修明故業於是廣開綿蕝重整緇帷築  
館而禮蘇林建堂而延趙德元戎擁篲八里滅其騎騶  
長吏式閭充庭贊其羔雁乃有三城碩彥五管俊髦朝  
聽讞而晚聽苞初詣微而終詣秀受徐遵明之指畫具  
有法程經張雕武之品題皆成偉彥羣流鑽仰萬眾歸  
依如百川之赴東瀛如列曜之宗北斗蓋自道咸而後  
講學漸稀惟夫子振厥宗風蔚爲時望爰從暇日更作

勝游校石讐方營池植果看花偶憩便駐行窩折芟相  
呼頻開雅會其視康成福命殆遠過之令嗣孝直孝彬  
孝堅茂才等父書克讀臣筆能傳朏月颺風遂憂遠樂  
琳瑯照耀萃在一門又非注禮傳宗貽書示戒者所可  
比也宗浚誼屬年家子又嘗肄業菊坡精舍敢比王基  
任嘏曾蒙國器之稱幸陪臨碩貝模獲附門徒之列惟  
願夫子膺通策之符永洪幌之算襄羊乎仁宇消搖乎  
福庭嘒嘒鍾祺嘒嘒葆吉綰綽壽考令名靡窮錫羨延  
洪翔機集嘏爲李柱史守典是司爲范長生述經不勅  
爲陶宏景位證眞仙爲桓春卿職參更老於以津逮流

輩楷模後生鑽堅研微析滯解惑此則黌山學舍不足  
比此專精通德高門無以加其榮寵蓋又章甫縫掖企  
踵期之而非但鰕生之私祝者已想此日羣仙高會光  
輝永映於南弧卜他年

四庫重開著作定呈於

東觀

史穆堂夫子六十壽序

蓋聞璧奎麗象文章之府輝焉睢渙交流文字之祥炳  
焉笙簫旣分苞符肇啟總持文柄賴有其人故出則侍  
蓬池登蘭省蔚爲卿景望若斗山獻賦玉堂紬書金匱

劉璣講學訓迪具有規條高郢薦科別拔半皆寒素此  
衡文之要官也處則闢精廬開綿蕪共麋菟首同坐皋  
比剖判斯文肇磨大義王筠詞客晚爲後進之宗裴秀  
經師夙負丈人之望此校文之重業也若我穆堂夫子  
大人者其殆兼之乎今年皋月中澣之吉爲夫子六袞  
大慶之辰槐市生徒檀橋文學纏連接踵從萃駢肩爲  
桓郁以祝延頌樊深而介祉絀弦奏雅駱驛紛承或謂  
雅量雲高虛懷海納恥隨殘客懶作熱官曾無水火之  
交自契陰陽之德談論同於何遠而絕鮮妄言應務等  
於范喬而曾無錯事是夫子之胸襟或謂筆墨清修觥

觥素志不近劉輿之臆不沾孔奮之膏儼鷺羽以同清  
比魚頭而共肅懷冰素矢澡雪自嚴寔之何虞任罄范  
丹之釜餽遺必卻曾辭封述之金是夫子之介節或謂  
恩洽梓鄉誼敦枌里凡夫增試院拓文場卹孤嫠籌助  
餉定社倉之新法復黌序之舊規莫不極慮鉤稽悉心  
核畫或事須關說則恥同劉勝之蟬或弊恐潛滋則預  
絕韓非之蠹是夫子之才能或謂薤樸修型堅貞拔俗  
雖復躋華廡轉清班駕輶軒持旌節嘽嘽愈惕躡躡彌  
勤無慚輓輓於鹿車不侈風流於塵柄宗慤串嘗粗食  
祭遵罕御奇衣瓢勺枌皮卽留賓之潔饌被梳枕刷爲

居室之常裝是夫子之節儉然此特其行修之粹懿而  
未及其文采之彌彪也今夫授經伏勝多享耆年稽古  
桓榮咸臻耄齒豈徒延禧集祜緝福曼齡已哉良由抱  
質洪龐稟靈粹美神峰自聳氣海常溫劉沓之敏識過  
人高允之聰強絕世枕經蔗史無非益壽之圖耨瑟耕  
琴卽是延年之錄是以眾流仰鏡多士追隨若水歸壚  
如星拱極臧榮緒晚爲師表獨負時名陸德明素詡大  
儒褻然領袖作士林之圭臬爲藝苑之楷模者良非無  
故也已惟夫子青瑣傳家黃茵誕慶鎔于善識服匿能  
詳七十家非夷吾莫知三萬言惟方朔能誦旣而濯鱗

太液擘翅方壺鰲禁含香螭坳侍直進奇木白麀之奏  
上賞其工獻嘉禾神雀之篇世驚其麗時也上方給札  
中祕繙書璆檢金繩校仙函於宛委瓊綱玉緯編

帝紀於禪通書杜預之蠻牋訂吳兢之史軸往往渥承  
賞賚屢荷榮施分翠脯於天庖飫縹醪於法酒鶴綾鵲  
綺邀

御賜之便蕃鳳輦鰲山侍

宸游之暇豫視夫卷阿矢音闕廟作頌者何多讓焉未  
幾而晉掌成均特膺司業以劉芳之洽熟兼許懋之精  
勤朱墨有銘藉其砥礪丹青之染荷厥甄陶甫經轉秩

於儲坊又睹參華於

禁近異恩稠疊併集一時至於一校京闈兩持使節星  
輶遠駕冰鏡高懸千尋搜鄧植之材萬隻採鍾山之玉  
王起悉心校閱多半知名和凝杜絕請求並無妄舉瑣  
廳旣徹聲譽翕然無車推挽脫之嘲得古誼忠肝之輩  
含珠之蚌詎致韜光戴石之螯不慙忤首璿衡遠揭珊  
網無遺夫子之力也然而庭栽苜蓿久已辭官殿撤蒲  
萄未遑饋母迨巡河而泣役彌陟圯以殷情孟舍遄歸  
潘輿恪侍旋悼苦心之蓼永懷樹背之護於是更下講  
帷重開埤塾上舍中含悉萃英流大黌小黌別新傑構



闢精廬而校藝合都講以陳經別搜柱下之編同拾淹  
中之典撫清琴於汾曲似迴疏屬之山採磬石於交州  
恍建豫章之館則有冠裳纚纚俎豆莘莘難經義者盡  
屬戴彭受書說者半皆房魏畫樂詳之杖指引特精炙  
顏斐之薪款談自洽亦有齒牙獎借毛羽吹噓拔名才  
於馬廐之間遴奇士於牛醫之下邢子才之淹雅喜汲  
引於時名徐孝穆之虛衷罕詆訶乎後輩固宜其人文  
鳳起士氣彪騰者矣況乎燕桂挺芳謝蘭擢秀四經並  
授七業俱興矜令嗣君等犀角標奇鳳毛濟美鄭小同  
之志量合守淵源溫大雅之才名宜參侍從行復登雲

路掇巍科比桐木以名家類棣華而造勝影纓拖組對  
管絃綸取印提戈各膺旄節謂非夫子之章簾克擢顏  
誥親貽者而能若是乎邇者永日延祥景風介祉榴花  
酒熟荔子漿濃斟延壽之醪擊迎涼之脯青葵扇枕承  
懽幸有黃香綠芰開筵留讌倘同鄭敬宗浚叨承眄睞  
素荷生成傳衣喜隸於及門珥筆又居乎後進欣逢覽  
揆聊效引嚙與北海而同時信多僥倖指南山而獻祝  
莫罄掄揚惟願夫子膺九秩之符衍十稔之算神明克  
鞏禔祐無疆彭鏗爲商代聞人實司典籍兒寬本漢庭  
耆碩兼擅儀章海內仰若靈光

朝中欽爲尊宿吾知它日陳祝嘏而頌期頤者又將重  
斲雉飮之觴而再奏鶴飛之曲也

周福陔中丞夫子六十壽序

若夫青徐沃野勃碣雄藩語其山川則泰岱之穹窿實  
高乎八柱論其郡邑則臨淄之繁盛特冠乎五都天文  
繫辰虛之星地脈接成梁之海固宜史遷稱爲膏壤吳  
札美其大風已

國家重東魯衣冠之俗塵北門鎖鑰之司妙簡元臣以  
資填撫則我福陔中丞夫子實膺

異命來總師干智裕複單策全臬散秉羽於寢斟樽於

衢士女謳吟黎儀踊忭政通事舉民用大和粵以仲冬  
之吉爲夫子六袞壽辰於是搢紳士大夫咸以介壽之  
辭來請竊謂昔南山之歌壽考也託臺萊而起興而其  
序乃云樂得賢臣西漢之詠壽人也借都荔以喻芳而  
其詞乃曰顯明昭式豈非以膺台緄擁節旄必有齡天  
耀日之勲始鍾錫羨延洪之慶請援斯義以侑觴行可  
乎惟夫子盅盅鸞和翟翟鷺潔始自童丱卽傳神姿見  
虎檻而不驚解牴藩而善對登高作器才備於九能照  
軫充箱目窮於四部旣乃躋蘭省直芸廳入校祕文出  
持軺傳瑞雪下而奏謝莊之賦文星明而占李邵之車

採藻紛纒飛辭適麗銅闥待詔則東馬儕蹤金匱紬書  
則南狐比直詞臣榮遇公實兼之旣轉柏臺風烈丕著  
雞棲一乘牙繡五章鍊肝表其不撓銀手徵其善斷崇  
儉黜華有紫服懲奢之奏焉彈奸劾佞有早囊遞事之  
風焉繼督糧儲移旌山左萋萋盡力疊疊從公劉晏之  
造漕引三千艘連檣悉濟薛平之灌濡田七百頃積潦  
全消固以望慰去思歌興來暮矣嗣陳粵臬更擢燕藩  
弭節越臺之山剖符碣石之館遂復求吏治整戎行拯  
歉荒備儲侍餽遺盡卻遠媿乎剔魚臥護必嚴乃同乎

馭馬時值

聖天子嗣服之五載萬物芄蘭八方清晏繫維秦晉迭  
告禮饑山東僻近災區毘連畿輔俗成些窳吏習惰媮  
天子曰嘻憫彼東人其孰克震撼之以威猛輯柔之以  
寬仁以救我巖疆以綏我士庶念淮陽之臥治惟汲黯  
素優知河內之久留非寇恂不可

詔下之日商怵於市農謳於疇焚香以迓盧潛置酒而  
迎孟信鵬幟鞞章之士遮迓臚歡唐巾襴帶之儔雍容  
紉雅則夫子之淪浹於東人者亦可見矣旣開戎府首  
究河防考宣房礎石之謀復神禹醴渠之迹小波淪而  
大波瀾共慶安流左隄傷而右隄彊自成鞏固故得津

平白馬浪靜青猴荻筍苗生桃花米熟其治河之功有  
如此者宣泄旣宏轉輸益便爰開土壩更扼要衢來者  
負韓滉之囊去者掾陸機之舫蠟光遠浦平看越艇之  
飛鶩影長空坐指遼帆之轉其運漕之利有如此者煙  
台者北道咽喉東齊門戶擬招勁卒苦乏餉糈爰抽撩  
淺之軍俾結破胡之隊鼓奔輪而競進漆塗杜亞之舟  
激利鏃以橫飛響落陳音之箭更講求乎機器益足壯  
乎軍容銃轟而燄吐鴛鴦礮擊而笳開蝴蝶其訓兵之  
勤有如此者至於六條按吏三式任人或超擢以拔才  
能或敘資以優閑散務使裴清玉簡各効馳驅杜短周

長咸供委任尤嚴貪墨務絕苞苴僚佐無黃札之營營  
役罕銀杯之化其察吏之密有如此者今者野無帶劍  
戶有鳴絃波澄孔殲之風缶滿魯恭之雨桑麻野沃仁  
恩共戴平韋丹花柳村明泥飲共歌乎嚴武蓋皆夫子  
之善政所貽也聞之美意者延年安敦者受福昔有東  
廣微之政治願報長生李君奭之循良代祈久任斯皆  
澤流百里聲冠一州業播口碑共銘心版矧乃福曜普  
臨於一路慈雲徧覆乎百城有不綰綽膺符幟麾竺祐  
貞祺炳爍茂祉便蕃者哉令嗣君等伯歌季舞驥子龍  
文咸荷門基鬱爲公望宗浚夙承陶鑄遠企音徽敬陳



祈嘏之詞用代帑鞫之祝爰歌以侑之曰江漢之靈荆  
隨之美篤生我公潭福溶祉仕宦隆隆有車生耳以昌  
其身以施於孫子又歌曰穆穆我公令德令儀民有歎  
歎公攜持之民有彫彫公撫綏之穆穆我公匪東人是  
私惟

天子是毗惟百國是師羣生嘒嘒樂不支祝公作相登  
彤墀九節之杖千年芝消搖壽車兮長靡涯

岑西林宮保壽序

夫六星麗天牧伯應其象五嶽鎮地公侯比其尊疆寄  
之司由來重矣今

聖天子中興嗣業下武承基凡任封圻類皆碩艾莫不  
建齡天之績熙曜日之勛衛武高年表棊竹儀型之善  
召康純嘏賡稽桐霽吉之庥若我西林宮保岑公者信  
邊徼之屏藩而

熙朝之柱石者歟今年仲夏之吉爲公六袞開九壽辰  
於時粵士大夫宦於滇者咸執爵言曰公德澤被於百  
城勳烈高乎九寓匪徒曰揚光振景焜耀鄉閭已也然  
而日輝層霄基於茲木河潤千里首及近壖是以任嘏  
賁而樂安稱杜銓顯而京兆重紀羣清望增潁川冠冕  
之華辛趙勳壯隴右韜鈴之色揚嫩導懿烏可無言

請臚陳不朽之三以預祝大齊之百可乎惟公昂緯降  
精雲雷薦祉劬書靡倦賦成赤鵠之篇學劍能爛洞習  
白猿之術目營四部聲振一轡魁士通儒咸引重焉時  
值九縣飄迴八荒霧塞蛇生林屋鳥起翟泉孤城摧獸  
角之旌列障委狼牙之弩公乃倚籬條而舞具袴褶以  
行據鞍則紫燕斜飛橫劍則青龍靜吼蓋志略自此遠  
矣其投筆入滇也始從棒檄爰逮建旄屢揮絳幘之兵  
頻斬白題之將破之於湯池克之於潑江蹙之於鎮雄  
殪之於大理封狐授首長鯁就縛埃烽息警盡摧林邑  
之犀貢驛遙通遠致條支之鳥

天子嘉之翠羽頒榮青宮

晉秩彤虛沛賞帶礪申盟表郭賀而撤帷資鍾繇而銘  
釜雖吾粵士彥威治交南之績何忠靖保嶺外之功不  
是過也武備旣修文事乃舉遂復澄吏治謹蠻防均賦  
徭減兵額荒蕪未闢募開墾以招之蠻塾未興復制科  
以勵之故得化梟爲鳳使馬如羊防吏胥而五蠹除奸  
蒐士卒而千牛募勇勞農畎壟王丹之載酒肴課士膠  
庠范甯之求磬石雖吾粵陶自強之撫蠻著烈崔正子  
之帥蜀稱能不是過也未幾移旌黔嶺建節閩疆除寇  
逆於梵淨之山耀軍容於臺澎之海撫凋瘵拯流亡肅

官常練軍伍舉綱赦過則訓守於班超覈實循名則謨  
同於葛亮由是沴消青犢氛掩白鵝雉塲開蹢躅之營  
蠶扇靜樓船之浦雖吾粵海剛峰整臺綱而察吏周旣  
濟免輸稅以惠民不是過也六詔名區五華重地

帝心所眷使節重臨如陽嶠之再泣荊州譬崔戎之復  
還陝部值觸蠻之搆釁統鷺鶴以臨關卻叔虎被羽先  
升吾邱鳩擲車乃戰誓擒母寡擬埽姑句雖卷旆旋師  
未獲正瘳楊之戮而揚旂致果已足驚賢栗之魂洗兵  
於白虎祠中捲帳於青蛉石上雖吾粵余武溪才推折  
虜李時亮策擅平邊不是過也竊惟服領以南山川俶

詭郭璞美其盛氣葛洪指爲仙都磅礴扶輿是生環傑  
譬之斗南間氣特鍾梁國名臣代北雄姿崛起扶風將  
略產祥降嘏其在公平宜其膺通衆之符懋洪幄之祉  
精神矍鑠奚須斟胡廣菊泉風采雍容詎待策山濤藜  
杖近雖龍編暫駐虎帳方開簿書仍必躬親履屐咸令  
得所慎微謹小察吏欺於攫肉之餘汰弱留強寄軍政  
於捕蟬之際其神明鞏固福履聰強信不可及已或疑  
公負趨趨之才抱翦翦之度枕戈誓志運甓習勤似無  
暇綯雅弦匏評松頌柏殊不知楚敖秉羽荆人所以息  
兵羊祜輕裘吳敵戒無近壘是以狄營開醢祭帳投壺

雍容之度也謝墅圍碁郾城張樂又奇譎之謀也矧今  
者約奉黃龍盟堅白馬回圖之使願納賧錢僕遯之酋  
罷持契箭戎氛旣靖壽醪爰開投簞醪而斟祝嘏之觴  
奏桐鼓而代介祺之曲俾知營平勇略策著屯田潞國  
耆年會聯入社固足彰

聖世威棱之遠并足伐遠人畔援之謀詎徒曰十賚徵  
文八琅侖爵而已哉近者

溫綸屢賁

珍貺頻頒旣荷

朝恩并鍾家慶令嗣君等或握蘭又陞或折桂璫闡聞

岐嶷之尙多卜顯揚之靡艾勛名濟美業同竇氏移華  
科第馳聲不數韓家桐木此又禔流慶衍並在一門者  
矣某忝司衡校同隸泮幪爰合梓里以徵文特進蕪詞  
而介祉永祝齡筭翼近光輝於南極老人行看  
晉位台司邁福命於西京計相

梁游菴司馬六十壽序

維元默敦牂之歲月在仲夏爲我

誥授通議大夫游菴姻兄大人六袞壽辰宗浚忝同葭  
未之親並託苔岑之契張南周北慣共往來裴尾黃頭  
兼同酬唱企停雲而在望瞻福曜以長明宜致邵張之



詞用祈綰綽之算竊謂祝壽以文古無所考也惟是啐  
醴之言證諸周典希韜之敬紀自遷書稱觴則事舉漢  
儀介雅則樂詳隋志逮乎有宋佳製遂多賀東坡居士  
之生辰兼貽古畫頌南澗尙書之慶誕遂媵新詞揆藻  
雲鋪騁詞霧涌然則頌柏評松以伸其悃雕霞鏤月以  
介其庥者或亦士君子所不廢乎惟君襲慶銀艾餐榮  
玉芝方其勤著然糠慧傳格竹誦謝莊之百典識朱育  
之千名威斗鎔于奇聞必錄犧尊鶴尾閭記無遺九事  
能知十行並下柑榴詠就鴻才見許於鉅公春草吟成  
行卷交推於時輩斯爲早歲業擅英聲顧以下第之劉

贊忽作焚書之王壽杜園久署隱市何嫌於是跌宕湖  
山批評風月豪揮青兕健搏赤猿扣鐵如意以徵歌酌  
金叵羅而賭醉虞松夙志何妨臥酒吞花張楚雅懷未  
礙彈絲吹竹譜大垂小垂而度曲賦團雪散雪以抒懷  
斯中歲之酣嬉極娛遊之樂事晚耽寂靜頗慕幽棲蕭  
大園言志之篇江總持修心之賦營池植果校石讐方  
射弧開筵折松當塵見漢陰叟之抱甕惟願息機覩河  
上公之委裘輒懷知足嘗取孫興公語築遂初樓以見  
志而君自此遠矣夙耽吟詠時喜推敲往與游蓉裳前  
輩陳經甫孝廉等同結紅棉詩社鏡水雅集遠逾寶元

吹臺共登直軼高李車斜鬪捷競病爭諧緊游藝之多  
能更臨池之特妙纖妍適媚得戲鴻帖之風神焉古拙  
沈雄仿瘞鶴銘之體格焉至於蘊善如春虛懷若谷庾  
赤玉胸襟無滯迴出塵氛杜黃裳器局不凡羣推碩望  
且也重施子宏解推礪義滂仁捐贏斥羨偶逢佳士輒  
與解襦倘遇窶人何妨焚券尤敦宗誼獨建祖祠慕范  
氏義田之規守韋家花樹之法誦呦呦之鹿則合食聯  
其歡愉歌浩浩之魚則捐財助其婚嫁屢資饋貧之粟  
咸歌續命之田此則盧鈞喜聽善言暮年更篤高允好  
行陰德晚歲彌勤蓋慈愷之懷固數十年如一日也惟

素性之冲和獨孤懷之貞介夙耽夷曠不妄交游荀粲  
范汪尙稀許可曹蜍李志更鮮往還居嘗自謂迹寄闔  
闔而心超埃壒食雁之客甫應對而已忘雕龍之賓或  
攀援而罕接則君之高懷鷺潔逸志鴻鶩又可見矣夫  
藹德者厚故其集福也隆植基者長故其膺祺也永茲  
逢窮月適際鰲辰妃子之荔登筵仙人之桃飮座蒲觴  
有泛楚醺越酎之芬蘭膳彌馨孟筍江魚之味哲嗣綺  
川大兄等器原干莫材盡璠璣庭誥能承門基克荷六  
詩三筆知此時翺鳳以蜚聲七相五公卜他日珥貂而  
入仕

紫誥疊邀夫

錫命斑衣共喜乎承懽遠遞郵函辱徵幃語宗浚竊謂  
昔徐幹中論云有聲聞之壽有仁德之壽如君者其殆  
兼之乎爰臚述乎生平不侈陳乎靡藻預祝富平七葉  
咸躋祕閣之班仍期元爽百齡重赴香山之社

受業子壻陳慶鰥校字